

याकूब

1 परमेशुर केर अउर परभु यीसु मसीह केर दास याकूब की ओर ते उइ बरहों कुलन का जउन बिखरे हुइ केर रहत हैं नमस्कार पहुंचे।

संकट अउर परिच्छा

²ए हमरे भइया लोग जब तुम मेर—मेर की परिच्छा मा पड़ौ। ³तौ ई का पूरे खुसी केर बात समझौ, यू जानि केर कि तुम्हरे विसवासु केर परखे जाय ते धीरज पैदा होत है। ⁴मुला धीरज का आपन पूर काम करै देव, कि तुम पूर अउर सिद्ध हुइ जाव, अउर तुम मा कउनिय बात केर कमी न रहै। ⁵मुला तुम मा ते कउनेउ का अक्किल केर कमी होय तो परमेशुर ते मागे जउन बिन उरहन दिए सबका खुले हाथन ते देत हैं, अउर उहिका दीन जाई। ⁶मुला भरोसा ते मागे, अउर कुछ संका न करै, काहे ते कि सन्देह करै वाला समुंदर केर लहरन की तरह है। ⁷जउन बयार ते बहती अउर उछलति है। अइस मनई यू न सझे कि मोका परभु ते कुछ मिलत है। ⁸उइ मनई दुलमुल है, अउर अपनी सबै बातन मा चंचल है।

⁹दीन भाई अपने ऊंचे पद पर घमंड करै। ¹⁰अउर पैसा वाला अपनी नीच दसा पर काहे ते कि ऊ घास केर फूल केर जस जात रहिहैं। ¹¹काहे ते कि सूरज केर उगतै करेर धूप (कर्क घाम) परत है अउर घास का झुलसाए देत है, अउर ऊ केर फूल झरि जात है, ऊकेर सुन्दरता जात रहत है, वही तरह पैसा वाला अपनी राह प चलत—चलत धूरि मा मिल जाई।

¹²धन्य है, ऊ मनई जउन परिच्छा मा थिर रहत हैं, काहें ते की ऊ खरा निकर केर जिन्दगी का ऊ मुकुट पाई, जी केर वचन ते परभु अपने ते सनेह करै वालेन का हिनि है।

¹³जब केहू केर परिच्छा होय तो ऊ यू न कहै कि हमार परिच्छा परमेशुर की ओर ते होत है, काहे ते कि न तो बुरी बातन ते परमेशुर की परिच्छा हुइ सकत है अउर न ऊ केहू केर परिच्छा आपै करत है।

¹⁴मुला हर मनई अपने इच्छा ते खिंचि केर अउर फंस केर परिच्छा मो परत है। ¹⁵फिर इच्छा गरभवती हुइ केर पाप का जनति अउर पाप जब बढ़ि जात है तो मउत का पइदा करत है।

¹⁶ए हमरे पियारे भइया लोग, धोखा न खाओ। ¹⁷काहे ते कि हर एक अच्छा वरदान अउर हर एक बढ़ियां दान ऊपरै ते है अउर जोतियन केर बप्पा केर ओर ते मिलत है; जी मा न तो कुछ बदलत है अउर न अदल बदल केर मारे ऊ परछाई परत है। ¹⁸ऊ अपनी ही इच्छा ते हमका सच्चाई केर वचन ते पइदा किहिन जी ते कि हम ऊ की रची भई चीजन मा ते एक तिना केर पहिला फल होई।

सुनना अउर करन खातिर

¹⁹ए हमारे पियारे भइया लोग, ई बात तुम जानत होई मारे हर एक मनई सुनै खातिर तैयार अउर बोलै मा धीरा अउर गुस्सा मा धीमा होय। ²⁰काहे ते कि मनई केर गुस्सा परमेशुर केर धरम का निभाय नाहीं सकत है। ²¹ई मारे सारी गन्दगी अउर बैर भाव की बढ़ती का दूर कइके, उइ बचन का नरमी ते मान लेव, जउन जियरा मा बोया गवा है। अउर जो तुम्हरे परानन का कल्यान कइ सकत है।

²²मुला वचन पै चलै वाले बनों अउर खाली सुनै वाले नाहीं जो अपने आप का धोखा देत है। ²³काहे ते कि जउन कोऊ वचन का सुनै वाला होय अउर ऊ पर चलै वाला न होय, तउ ऊ मनई केर जस है जउन आपन असली मुंह सीसा मा देखत हैं। ²⁴ई मारे कि ऊ अपने आप का देखि केर चला जात है अउर जुरतै भूलि जात है कि हम कइस रहेन। मुला जउन मनई आजादी केर सिद्ध परबन्ध पर थियान करत रहत है ऊ अने काम मा ई मारे असीस पइहैं। ²⁵कि सुनि केर भूलत नाहीं मुला वइसने काम करत हैं।

²⁶जो कउनौ अपने आप कइहां भगत समझें अउर

अपनी—अपनी जीभ पइहां लगाम न दे, मुला अपने जियरा का धोखा दे तो ऊ की भगती बेकार है।²⁷ हमरे परमेसुर अउर बप्पा केर पास सुद्ध अउर साफ भगती यहु है कि अनाथन का अउर रान बेवा केर दुख मा उनकी सुधि ले अउर अपने आप का संसार ते पवित्तर राखे।

पछपात न करिन

2ए हमारे भइया लोग, हमरे महिमा वाले परभु यीसु मसीह का भरोस तुममा मुंह देखे केर साथ न होय।² काहे ते कि जउन याक मनई सोने केर अंगूठी अउर नीक कपड़ा पहिले भये तुम्हरी सभा मा आवे अउर याक कंगालौ मइले कुचइले कपड़ा पहिले भाए आवे।³ अउर तुम उइ नीक कपड़ा वाले का मुंह देखि केर कहो कि तुइ हुआ अच्छी जगह बइठ, अउर उइ कंगाल ते कहो, कि तुइ हुआ ठाढ़े रह या मोरे पावन केर पीढ़ी केर तीर बइठ।⁴ तो का तुम आपस मा भेद—भाव नाही किहेव अउर बुरे विचार ते नियाव करै वाले नहीं भयो?

⁵ए हमारे पियारो भइया लोग, सुनौ, का परमेसुर ई दुनिया केर कंगालन का नाही चुनिन कि भरोस मा धनी अउर उइ राज केर अधिकारी होय, जी की परतिग्या ऊ उनते किहिस है, जो ऊसे सँदेस राखत है।⁶ मुला तुम उइ कंगाल का निरादर किहयो का पैसा वाले लोग तुम्हरे ऊपर अत्याचार नहीं करत अउर का वही लोग तुमका अदालतन मा खींच—खींच केर नाही लइ जात? ⁷ का उइ लोग उइ बढिया नाम की बुलाई नाही करत जी केर तुम कहे जात हौ? फिरौ जो तुम पवित्तरसास्त्र केर ई वचन केर मुताबिक केर तुइ अपने पड़ोसी ते अपनी तरह नेह रख।

⁸ साचौ उइ राज्य परबन्ध का पूर करत हौ, तो नीकै करत हौ।⁹ मुला जो तुम भेदभाव करत हौ तो पाप करत हौ, अउर कानून तुमका अपराधी ठहियावत है।¹⁰ काहे ते कि जउन कोऊ सारे कानून का पालन करत है मुला याकै बात मा चूक जाय तो ऊ सबै बातन मा दोसी माना गवा।¹¹ ई मारे कि जउन यहु कहिस कि इ कोऊ केर जिउ न लिहे ई मारे जो तुइ बेभिचारु तो नहीं किहे मुला जि उ लेकी फिरौ तुइ कानून का न माने वाला माना गवा।

¹² तुम उन लोगन की तरह वचन बोलौ अउर कामौ करौ, जिन केर नियाव आजादी केर परबन्ध केर मुताबिक होई।¹³ काहे ते कि जउन दया नाही किहिस, ऊकेर नियाव बिना दया केर होई दया नियाउ पर जीत पावत है।

विसवासु अउर कामु

¹⁴ए हमरे भइया लोग, जो कोऊ कहै कि हमका भरोस है मुला ऊ काम न करत होय, तो ऊसे का फायदा? का अइसन विसवास कब्बो ऊकेर उद्धार केर सकत है? ¹⁵ जो कोऊ भइया या बहिनी नगे उघारे होय अउर उनका हर दिन खाए केर कमी होय।¹⁶ अउर तुममा ते कोऊ उनसे कहै, कुसल ते जाव तुम गरम रहौ अउर भरे पूरे रहौ, मुला जउनी चीजन की देह केर खातिर जरूरी है उइ ऊ का न दे, तो का फायदा? ¹⁷ वही तरह विस्वासौ जो करम केर साथ न होय तो अपने सुझाव मा भरा भवा है।

¹⁸ नहीं तो कोऊ कहि सकत है कि तुइका भरोस है अउर हम करम करित है। तुइ आपन भरोस हमका करम केर बिना तो दिखाव, अउर हम आपन विस्वास अपने करमन केर सहारे ते तुइका दिखाउव।¹⁹ तुइका भरोस है कि याकै परमेसुर है, तुइ नीक करत है। बुरी आतमाएं वाले विसवासु करत है अउर थरथरावा करत है।

²⁰ मुला हे निकम्मं मनई का तुइ यहू नहीं जानत कि करम केर बिना विसवासु बेकार है।²¹ जब हमरे बप्पा अबराम अपने बेटवा इसहाक का वेदी पर चढ़ाइन तो का ऊ करमन ते धरमातिमा नहीं माना गवा।²² सो तुइ देखि लिहे कि विसवास ऊ केर कामन केर साथ मिलि केर असर किहिस है अउर करमन ते भरोस सिद्ध भवा।²³ अउर पवित्तर सास्त्र केर यू वचन पूर भवा कि अबराम परमेसुर केर भरोस किहिन अउर यू ऊ केर खातिर धरमी गिना गवा अउर ऊ परमेसुर कादोस्त कहा गवा।²⁴ सो तुम देखि लिहयो कि मनई खाली बिसवास ते नाही मुला करमन ते धरमी माना जात है।

²⁵ वइसनै रहाब पतुरियो जब दूतन का अपने घर मा उतारिस अउर दूसरी डगर ते विदा किहिस तो का करमन ते धरमी नाही मानी गै? ²⁶ मतलब यू, जइसे देह आतमा बिना मरी भई है वइसनै विसवासु करम बिना मरा भवा है।

जुबान केर बस मा करिन

3ए हमरे भइया लोग, तुममा ते बहुत बकता न बने काहे ते कि जानत हौ कि हम उपदेस दे वाले अउरो दोसी माने जइहैं।² इ मारे कि हम सब बहुत बार चूक जाइत हैं, जउन कोऊ वचन मा नाही चूकत वहै तौ सिद्ध मनई है। अउर सारी देह पर लगाम लगाय सकत है।

³ जब हम अपने बंस मो करै खातिर घोड़न केर

मुंह मा लगाम लगाइत है तो हम उयकी सारी देहों का फेरि सकत है।⁴देखो, जहाजो, वइसै तो अइसन बड़े होत है अउर तेज बयार ते चलाए जात है फिरौ एक छोट केर पतवार केर सहारे मल्लाह की इच्छा ते घुमाए जात है।⁵वइसनै जीभौ याक छोट केर अंग आय अउर बड़ी-बड़ी बातें हौकत हैं देखौ तनिक सी आगी ते कित्ते बड़े बन मा आगी लाग जात है।⁶जीभौ याक आगी आय, जीभ हमरे आंगन मा अंधरम केर याकु संसर आय अउर सारी देह पर कलंकु लगावत है, अउर संसार चक्र मा आगी लगाय देत है अउर नरक कुंड की अगिन ते जलत रहत है।

⁷काहे ते कि हर तरह केर जंगली जानवर, पंछी, अउर रंगे वाले जीउ अउर पानी मा रहै वाले जीउ तो मनई की जात केर बस मा हुइ सकत है अउर हुइ गए हैं।⁸मुला जीभ का मनई मा ते कउनो बस मा नाहीं कइ सकत, ऊ याक अस बलाय आय जउन कबहूँ रुकते नाहीं, वा परान नास करै वाले विस ते भरी भई है।

⁹यही ते हम परभु अउर बप्पा की गुनगान करित है, अउर यहै ते मनइन का जउन परमेसुर केर रूप मा पइदा भए हैं सराप देइत हैं।¹⁰एकै मुंह ते धन्यवादु अउर सराप दूनौ निकरत है।¹¹ए हमरे भइया लोग, अइसा नाहीं होय का चाही।¹²का सोता के याकै मुंह ते मीठा अउर नमकीन पानी दूनो निकरत हैं। ए मोरे भइया लोग का अंजीर के बिरवा मा जैतून या अंगूर की बेल मा अंजीर लाग सकत हैं? वइसनै नमकीन सोता ते मीठा पानी नाहीं निकर सकत है।

दुई किसम ते ध्यान

¹³तुममा ग्यानी अउर समझदार कउन है? जउन अइसा होय ऊ अपने कामन का अच्छे चाल चलन ते उइ नरमी सहित दिखावे जउन ग्यान ते पइदा होत है।¹⁴मुला जो तुम अपने मन मा जलन अउर बैर खिलाफ राखत हो तो सच्चाई केर विरोध मा घमंड न किहयो अउर न तो झूठ बोल्यो।¹⁵ई ग्यान ऊ न आय जउन ऊपर ते उतरत है मुला संसारी अउर देह केर अउर सैतान केर आय।¹⁶ई मारे कि जहां जलन अउर विरोध होत है हुआं बखेड़ा अउर हर तरह के बुरे कामों होत हैं।

¹⁷मुला जउन ग्यान ऊपर ते आवत है ऊ पहिले तो पवित्तर होत है, फिर मिलनसार, कोमल, अउर नरमी, अउर दया, अउर अच्छे फलन ते लदा भवा अउर भेदभाव, अउर कपट ते अलग होत है।¹⁸अउर

मिलाप करावै वालेन के खातिर धरम का फल मेल मिलाप के साथे बोवा जात है।

अपन क परमेसुर केर सौपि दवे

4 तुमका लड़ाई अउर झगड़ा काहं ते आय गए? का उइ भोग ते नाहीं जउन तुमरे देहिन मा लड़त भिड़त है? ²तुम इच्छा राखत हो अउर तुमका मिलत नाहीं तुम हत्या अउर जलन करत हो अउर कुछ पाय नाहीं सकत हो, तुम झगड़त और लड़त हो तुमका यही मारे नाहीं मिलत, कि मांगत नाहीं। ³तुम मांगत हो अउर पावत नाहीं, ई मारे कि बुरी इच्छा ते मांगत हो जीसे की अपने लुच्चापन मा उड़ाय देव।

⁴ए बेभिचारिन, का तुम नाहीं जनतिउ, कि संसार ते दोस्ती करब परमेसुर ते बैर करब है? सो जउन कोऊ संसार का दोस्त हुआ चहत है ऊ अपने आपका परमेसुर केर बैरी बनावत है। ⁵का तुम यू समझत हो कि पवित्तर सास्त्र बेकार की बात कहत है जउनी आतमा का ऊ हमरे भीतर बसाइस है का ऊ अइसी इच्छा करत है जी केर फल जलन होय? ⁶ऊ तो अउरो किरपा करत है, ई मोर यू लिखा है कि परमेसुर घमंडियन ते विरोध करत है पर दीनन पर किरपा करत है।

⁷ई मारे परमेसुर के अधीन हुइ जाव अउर सैतान का सामना करौ तो ऊ तुम्हरे तीर ते भाग निकरी। ⁸परमेसुर के पास जाओ तो वह तुम्हरे पास आई, ए पापी लोग, अपने हाथ पवित्तर करौ, अउर ए दुचिते लोग, अपने जियरा का पवित्तर करौ। ⁹दुखी होवौ अउर सोक करौ, अउर रोवौ, तुमरी हंसी सोक ते अउर तुम्हार मगन होब उदासी ते बदलि जाय। ¹⁰परभु के समूहे दीन बनौ ऊ तुमका सिरामनि बनइहैं।

¹¹ए भइया लोग याक दूसरे की बदनामी न करौ, जउन अपन भइया की बदनामी करत हय या भइया पर दोस लगावत है, ऊ कानून की बदनामी करत है अउर परबंध पर दोस लगावत है अउर जो तुइ परबंध पर दोस लगावत है तो तुइ परबंध पर चलै वाला नाहीं मुला ऊपर मालिक ठहरा। ¹²परबंध दे वाला ऊपर मालिक तो याकै है जीमा बचावै अउर नासु करै की ताकत है, तुइ को आय, जउन अपने पड़ासी पर दोस लगावत है?

बड़ि चड़ि केर बात न करिन

¹³तुम जउन ई कहत है कि आज या कल हम करनौ अउरे सहर मा जाय कै हुवां याक बरस बितइवै अउर व्यापार कइके फायदा उठइवै। ¹⁴अउर

यू नहीं जानत कि कल का होई, सुन तो लेव, तुम्हार जिनगानी हइयै का? तुम तो मनो माप की तरह हौ जो तनिक देर दिखाई परत है फिर लोप हुइ जात है। ¹⁵ई केर उल्टा तुमका यू कहै का चाही कि जो परभु चाहे तो हम जीयत रहब अउर यू या ऊ कामौ करब। ¹⁶मुला अब तुम अपनी डींग पर घमंड करत हौ, अइसा सब घमंड बुरा होत है। ¹⁷ई मारे जउन कोऊ भलाई करब जानत है अउर नाहीं करत है, ऊ के खातिर ऊ पाप है।

धनवान केर चेतावनी

5 ऐ धनी जनौ सुन तो लेव, तुम अपने आवै वाले कलेसन पर चिल्लाय केर रोवौ। ²तुम्हार पइसा बिगड़ि गवा, अउर तुम्हरे कपड़न का किरवा खाय गए। ³तुम्हरे सोना चांदी मइहां काई लागि गइ है, अउर वह काई तुम पर गवाही देई, अउर आगी की तरह तुम्हार मांसु खाइ जाई, तुम आखिरी जुग मा धन बटोरयो है। ⁴देखौ जउन मजदूर तुम्हार खेत काट लिहिन उनकी वा मजदूरी जो तुम धोखा दइके रख लियो है चिल्लाय रही है अउर लवने वालेन की दुहाई, सेनन के परभु केर कानन तक पहुँचि गई है। ⁵तुम धरती पर भोग विलाव मा लगे रहौ अउर बहुत सुख भोगेउ तुम ई बध के दिन के खातिर अपने जियरा का पाल—पोस केर मोटा ताजा किहेव। ⁶तुम धरमी का दोसी ठहराय केर मार डारेउ, ऊ तुम्हार सामना नाहीं करत।

दुःख म धैर्य राखो

⁷सो हे भइया लोग, परभु के आवै तक धीरज धरयो, द्याखौ, गिरिस्ती वालार मनई भइयां केर बहुतै कीमती फल की आस राखत भवा पहिली अउर आखिरी बरखा होय तक धीरज धरत है। ⁸तुमहूँ धीरज और अपने जियरा का मजबूत करौ काहे ते कि परभु की सुभ अवाई नेरे है। ⁹ऐ भइया लो, एक दूसर पर दोस न लगाओ, जीसे कि तुम दोसी न माने जाओ। द्याखौ मालिक दुआरे पर ठाड़ है।

¹⁰ऐ भइया लोग उनका दुख उठावै अउर धीरज धरै का याक नमूना समझौ। ¹¹द्याखौ हम धीरज धरै वालेन का धन्य कहित है तुम ऐयूव के धीरज केर बारे मा ते सुने ही हौ अउर परभु की ओर ते ऊकेर नतीजा का भवा, वहु का जान लिहे हौ, जी ते परभु की बहुतै किरपा अउर दया दिखाई परत है।

¹²अमुला ए हमरे भइया लोग सबते बढ़िया बात या हे कि किरिया (सौ) न खायौ, न सरग की न पिरथी न कोऊ अउर चीज की, मुला तोहार बातचीत हां की हां अउर नाहीं की नाहीं होय, कि तुम सजा के जोग न माने जाव।

बिसवासु केर पराथना

¹³जो तुममा कोउ दुखी होय तो ऊ अरदास करै, विनती करै, जो खुस होय तो ऊ गुनगान के भजन गावै। ¹⁴जो तुम मा कोउ बीमार होय तो कलीसिया के पुरनियन का बुलावै अउर उइ परभु के नाम ते ऊ पर तेलु मलि के ऊ के खातिर विनती करै। ¹⁵अउर विसवासु भरोस की विनती केर सहारे बीमार बच जाई अउर परभु ऊ का उठाइ के ठाड़ कइ देहै। अउर जो ऊ पापौ किए होई तो उनहिन की माफु हुइ जाई। ¹⁶ई मारे तुम आपस मा याक दूसरे केर समूहे अपने—अपने पापन का मान लेव, अउर याक दूसरे के खातिर विनती करौ जीसे नीक हुइ जाव, धरमी लोगन की विनती के परभाव ते बहुत कुछ हुइ सकत है।

¹⁷एल्लियाहा तो हमरी तरह दुख—सुख भोगे वाला मनई रहै, अउर ऊ गिड़गिड़ाय के विनती किहिस कि बरखा न होय, अउर साढ़े तीन बरस तलक धरती पर बरखा नाहीं भई। ¹⁸फिर ऊ विनती किहिस तो आकास ते बरखा भई अउर भुई फलवाली भई।

¹⁹ऐ मोरे भइया लोग, जो तुममा ते कउनौ सच्चाई की डगर ते भटक जाय अउर कोऊ ऊ का वापस बोलाय लावै, ²⁰तो ऊ यू जानि ले कि जउन कोऊ कउनेउ भटके भए पापी का वापस लेइ अइहँ ऊ याकु परान का मरै ते बचाई अउर बहुतै पापन पर परदा डारी।